



## Hooseglunggi 2006

An dr Tanggstell muesch di frooge  
Hänn si mi jetz doo betrooge  
Fir e Lämppli wird dr Tangg e drittel voll  
Frogsch e Schaich nur so zem Gspässli  
Was koschtets Oel by dir pro Fässli  
Sait är nyt dr Bund schloot alles uff e Zoll  
Au die kaibe Granggekasse  
Hauts bärguff y ka s kuum fasse  
Jetz hany gnueng y schnapp my Frau  
Und dislozier nach Wollerau

Au my Lääbe goot mool z Änd  
Denn mach ych uss mir e Spänd  
Myni Innereie kenne die denn haa  
Es isch mr glyych wär mi duet schnätzle  
Hyt kasch alli Daili wägsl  
D Hauptsach isch es kunnt ain vo Basel draa  
Kai Ziircher darf me transplantiere  
Kaini Härz und au kai Niere  
Es schytteret wirgglig nur an dämm  
Well d Ziircher z weeni Hirni hänn

Dr Zubi mit orangem Dress  
Bringt alli Fäns in groosse Stress  
Well är dr Balle fange will bevoor ain drifft  
Kuum ussem Gool sin d Auge zue  
Do hett doch kaine meh sy Rue  
Kennsch maine är hett gsoffe oder aini kifft  
Mir hätte jetz e Glanzidee  
E neije Gooli muess jetz aane  
Dr Zubi hätt denn vyl meh z tue  
Als Baizer in dr Blindekuh

Die siebe Bundesreet in Bärn  
Hänn sich wirgglig nimmi gärn  
S Kollegialprinzip das halte die nid yy  
Dr Guschpäng sait zem Joseph Daiss  
Isch doch wirgglig alles waiss  
Und dr Blocher schnuurt doch allne numme dryy  
Dr Leuebärger und dr Meerz  
Die sin fir mi scho lang e Scherz  
Dr Sämi Schmid zer Calmy Rey  
Lööt mi nid gäng son elley

Jedes Joor im Herbscht isch s glyych  
Zieht s in Siide s Fäädervyych  
D Raiseroute fiehrt si iiber unser Land  
Y saag zu mym Kolleg hej Digge  
Hesch du au scho d Vogelgrippe  
Isch dir s Tamiflu vo Roche au scho bekannt  
Jetzt mien die Veegel ab in Stall  
Sogar und das macht my so suur  
Nit nur dr Vogel vom mym Noochbr  
Au dä vo mynere Guggugsuhr

Dr alti Drämli Drämli Värs  
Gheere alli gärn das wärs  
Bym FCB schreyt au kain nachem Hügi Sepp  
Obwohl das regt mi langsam uff  
Und macht mi allewyyl no muff  
Wenns vo den alte Zyte hesch bisch nur dr Depp  
Doch im Summer vom letscht Joor  
Sin die alte Zyte koo  
Do wartet jede gärn uffs Drämli  
Denn alli Zyg sinn blybe stoo  
Wo sin die helschte Lyt dehai  
Ob groossi Lyychte oder glai  
Y finds no wichtig wo ischs gaischtig Potential  
Hesch au die Pisasändig gsee  
Zem Glygg duet dängge nit so wee  
Groossi Lyychte gits nur International  
Oh schregg oh schregg im letscht Dezämber  
D Endyschig isch denn riisegrooss  
Hänn mir die hellschte Lyychte gfunde  
An dr Ziircher Bahnhofstroos

Noh dämm beriemte Fuessballspil  
Mit vyll Kampf doch ohni Stiil  
Verlange d Schwyzer fir Thyrkei e satti Stroof  
My schwarzi Katz macht do e Buggel  
Wo si das seet vom Beni Huggel  
Wien är druff loos goot im Dunnäll - isch dä nit doof  
Är darf nit an dr WM schutte  
Und nimmt dr Alpey bi dr Hand  
Dr Muri sait zu baidne zämme  
Wass denn - ych gheer doch au zu Eyrem Land (zu Wellem)

Dr Schild isch jetz uffem Olymp  
Drumm macht är kaini grosse Gimp  
Wie die letschte Joore als Regierigsroot  
Deert hett är als erschte Schugger  
Miesse luege hools dr Gugger  
Das nit jede jedem aifach aini schloot  
Dä riise Bussekatalog  
Zwingt au dr Boss zem Dialog  
Die neij haisst nit Saskia Frei  
Suscht hättemer e Puff - by dr Polizei

Dr neij Cambus am mym Rhy  
Dä wird baut vo dr Chemie  
S alte Haafenareal muess deert ewäg  
Jetzt kunnt e ganz e nei Problem  
Die ander Syte wär bequem  
Me wuordi alles zyygle fir dä neij Zwägg  
Statt e Haafe - Hiiser baue  
Das saag ych Eych im verdraue  
Denn verliert - und do verreggi  
Au dr Schorsch sy Haafebeggi

In dr Stadt isch ebbis loos  
D Menschemängi riesegrooss  
Uffem Seibi lauft e riese tolli Feez  
Die Junge tanze uffem Platz  
Die Alte hänn e dumme Latz  
Dr politisch Unterschiid isch laider z grooss - me seet s  
Goosch in d Staine ain go schnappe  
Hesch denn gly ain uff dr Kappe  
Nur am Määrtplatz do isch alles myyslistill  
Im Joggeli unde dien si gumpe  
Rauche Hasch und au e Stumbe  
Heersch se schreyye wenn dr Ball nit ine will  
Mr sin doch Multikulturell  
Und wänn ass z Basel ebbis lauft  
Hätte mir statt s Budget z kiirze  
S Stadt-Theater doch verkauft



---

**Wottsch au by uns bänggle ?**

Schigg doch aifach e Brief in unser Boschtfach

VSG Postfach 4365 4002 Basel

Oder goosch uff, [www.fasnacht.ch/vsg](http://www.fasnacht.ch/vsg)

Und s Buech „**Jo das isch e Schnitzelbangg** „

Kasch au by uns bezieh.

---